

Ha'u-nia respeitus ba:

- Majór Jenerál Falur Rate Laek Vise Xefe Estadu Maiór Jenerál F-FDTL nian;
- Embaixadór Peter Roberts husi Austrália nian;
- Embaixadór Kinefuchi Masami husi Japaun nian;
- Embaixadór Philip Hewitt husi Nova Zelândia;
- Onradu bainaka-sira;
- No partisipante-sira iha ezersísiu Harii Hamutuk 2021

Bondia!

Lori Estadus Unidus Amérika nia naran, ha'u sente orgullu mai hamutuk ho ita-boot sira ohin hodi taka ezersísiu anuál Hari'i Hamutuk ba da-8.

“Hari'i Hamutuk,” ka “Build Together,” maka exemplu ida husi oinsá Estadus Unidus serbisu-hamutuk ho Timor-Leste, Austrália, Japaun, no Nova Zelandia hodi fortalese itania parseria-sira ne’ebé metin iha Rejiaun Indo-Pasífiku.

Durante semana haat nia laran, ita-boot sira treina ona no ezekuta tiha ona projeto no atividade konstrusaun sira balun ne’ebé hatudu ita-nia kompromisu komun ba parseria.

Iha Tilomar, Enjeñeiru-sira husi Estadus Unidus Amérika nia **Seabees** no F-FDTL troka koñesimentu ba malu kona-ba téknika soldajen no habilidades hodi konstrui fatin ba preparasaun aihán no meza servisu balun nune'e bele jere aihán ho seguru no eficiente.

Iha Hera, ekipa konjunta ida kompostu husi enjeñeirus Amerikanu, Australianu, no Timoroan treina no koko tiha ona sira-niaabilidade liuhusi monta Sistema Kiik ba Purifikasioun Bee.

Ekipamentu avansadu ne'e bele halo moos ka purifika bee masin litrus 280 iha oras ida nia laran no purifika bee fresku litrus 470 iha oras ida nia laran. Ida-ne'e reprezenta kapasidade noabilidade ida ne'ebé F-FDTL no ekipa NASAUN parseiru-sira bele utiliza hodi hatán ba nesesidade populasaun Timor-Leste nian.

No iha Baze Komponente Formasaun no Treinu iha Metinaro ne'e, ekipa ne'e mós fó ona asisténsia hodi hadi'a torre-de-rapel hodi hasae kapasidade treinu nian. Projeto konjuntu ne'e hanesan elementu esensiál ida ba Sentru Formasaun ne'e ne'ebé sei uza ba kursu oioin, inklui treinu ba militár kadete foun sira F-FDTL nian.

Servisu dia'k husi ita-nia militár-sira hatudu oinsá ita-nia kapasidade noabilidade hamutuk sei benefisia Timor-Leste no rejiaun ida-ne'e durante tinan hirak tuir mai.

Nomós, dalaruma importante liután duké obras fizikas maka ita-nia militár sira bele ona aprende ba malu, fornese ona apoiu, no hari'i tiha ona amizade entre sira ne'ebé dura ba tempu naruk. Amizade no kooperasaun maka xave ba ita-nia susesu iha tempu naruk.

Ezersísiu Hari'i Hamutuk ba dala ualu ne'e bele sai posível grasas ba Governu Timor-Leste ne'ebé permite eventu multinasionál ida-ne'e hodi lao ho seguru maske hasoru dezafiu sira ne'ebé hamosu husi pandemia.

Atu taka, ha'u hakarak kongratula partisipante-sira hotu ba ita-boot sira-nia ezersísiu Hari'i Hamutuk ne'e. Ita-boot sira-nia servisu maka'as no dedikasaun maka buat ne'ebé halo ona ezersísiu ida-ne'e sai susesu ida.

Obrigadu permite ha'u ohin bele fahe susesu ida-ne'e ho ita-boot-sira. Ha'u hein ba oin haree ita-boot sira hotu fila-fali hamutuk ba Ezersísiu Hari'i Hamutuk iha tinan 2022.

Obrigadu barak, no fim-de-semana diak!